



09. januar 2019

Inatsisartut Suleriaasianni § 37 imm. 1 naapertorlugu Naalackersuisunut apeqqutit imaattut matumuuna saqqummiuppakka:

Naalackersuisunut apeqqutit:

- 1. Kisitsisaatigineqarnerluni nunatsinni qassit meerartaarnerup kingorna isumatsangaarnermik eqqorneqartarnerisut? (Taamaassimappat ukiut qulit kingulliit ingerlanerini kisitsisit qanoq agguataagaappat)**
- 2. Kisitsisaateqartoqarpat nunap immikkoortuini assigiinngitsuni eqqorneqarsimasut qassiuppat aamma nunap immikkoortuini pinaveersaartitsinerit/ikiorsisarnerit assigiippat?**
- 3. Meerartaarnerup kingorna isumatsangaarnermik eqqorneqartut qanoq katsorsarneqartarpat, suliniutit suut atorneqartarpat?**
- 4. Angutit qassit meerartaareernerup kingorna isumatsangaarnermik eqqorneqartarpat aamma ikiorneqarnissaminut qanoq neqeroorfigineqartarpat, arnanut naleqqiullutik?**
- 5. Suliamut tunngatillugu Naalackersuisut allanik attuumassuteqartunik paasissutissaateqarpat?**
(Inatsisartunut ilaasortaq Randi Vestergaard Evaldsen, Demokraatit)

Tunngavilersuut

Nalusatsinnik amerlanerusut meerartaarnerup kingorna isumatsangaarnermik eqqorneqartarput. Ilaannikkut kingusinaarluni aatsaat paasineqartarput. Meerartaareernerup kingorna angajoqqaat timikkut tarnikkullu allaanerusumik inuuneqalersarput.

Inuuneq allanngorujussuuartarpoq aamma piumasaaqatit nalunngisassallu takkussuutilersarput. Inuit ilaasa allanngornissaq tamanna piareersimaffigisarpaat kisianni suut tamarmik piareersimaffigineqarsinnaangillat. Danmarkimi inuit quliungaangata meerartaasimasooq ataaseq isumatsangaarnermik eqqorneqartarpoq. Uannut soqutiginarpoq paasissallugu kisitsisit nunatsinni qanoq innersut. Meerartaarnernut atatillugu isumatsangaarnermik eqqorneqarnerannut pissutaasarput tarnikkut, timikkut inuttullu atukkat aamma kikkut tamarmik eqqorneqarsinnaapput.

Oqaatigineqartartut naapertorlugit meerartaarnermut atatillugu isumatsangaarnermut ataasiinnavik pissutaaneq ajorpoq. Nappaat takkussinnaasarpoq tarnikkut, timikkut inuttullu atukkat kingunerinik. Pissutaasut paasiuminaattarnerannut pissutaavoq pissutsit assigiinngitsut inunni ataasiakkaani annermik minnermilluunniit sunniuteqartarneri.



Uannut soqutiginarpoq aamma akineqassallunga nunatsinni angutit qanoq meerartaarnernut atatillugu isumatsangaarnermik eqqorneqartarnersut. Arnammi kisimik taamatut eqqorneqarnissaminnut ulorianartorsiorneq ajorput. Danmarkimi angutit 3-4.000¹ -t taamatut isumatsangaarnermik eqqorneqartarput. Qaqutigoortuunngilaq isumatsangaartarnerup arnap naartunerata nalaani aallartittarnera tamatumalu kingorna ajorsiertortarluni. Inuit meerartaareernerup kingorna isumatsarujussuuartartut isumaga naapertorlugu piffissaagallartillugu katsorsarneqartartussaapput, ilaqutariit naalungiarsuullu innarlerneqannginnerini. Isumatsangaarneq takkuttarpoq arnap angutilluunniit meerartaarnertik nuannaarutigisinnaanngikkaangassuk, imminnullu ajorileraangata anaanaalluannginnertik ataataalluannginnertilluunniit pillugu.

Assersuutigalugug Danmarkimi kommunit 98-iusut akornanni tallimat ataatanut/angutinut meerartaarnermut atatillugu isumatsassimangaartunut ikiuinissartik neqeroorutigisarpaat, naak angutit 3-4.000-t eqqorneqartaraluartut ukiumut. Taamaattumik uannut soqutiginarpoq tusassallugu nunatsinni angutit arnallu taamatut isumatsangaarnermik eqqorneqartartut qanoq ikiorneqartarnersut aamma qassit eqqorneqartarnersut.

Katsorsartinnissamut periarfissaqarpoq aamma kissaatigaara suliamik nangitsinissannut atatillugu immikkoortup tamatumap paasisaqarfiginerunissaa.

Tamanna tunngavigalugu ullut sulliviit naliginnaasut qulit iluanni apeqqutima akineqarnissaannut qilanaarpunga.

¹ http://sundmand.dk/Fars_foedselsdepr_pjece%20maj%202006.pdf